

## L' premie môtie

Ès vétçhînt en ènne p'tête tieûm'nâtè, dains ènne soûetche de v'laidge que comptait è pô prés tçhinze bacus. C'était in r'tirie yûe, mains lai fin airrivait è pô prés djainqu' en ènne romaine vie. È s' seuvniait qu' tiaind qu' èl était tot p'tét, son pére djâsait quéques côps d' aivô des romains soudaîts qu' péssînt ch' lai vie. Laivou qu' allînt tos ces soudaîts ? Ç' ât yos qu' se daivînt aidé dépiaicie po aichurie l' airriere di grôs romain l' Empire, d'lai sen di Rhîn. Les soudaîts aivînt dit en son pére qu' n' împoétche tiu s' poéyait engaidgie dains l' aîrmée, pochque ç' n' était p' soîe d' dépiaicie des vrâs Romains dâs Rome djainqu' ch' lai frontiere d' l' Empire. Les paioles de son pére yi r'vegnînt mitnaint dains sai tête de djûene hanne. Pe sai tête était encoé pieinne des imaîdges de son afaince, tiaind qu' è voyait les foûes soudaîts, les tchies, les mulats, les airmures, les lainces, les bouçhies, ... In djoué, èl aivait meinme vu in romain tchèf chus son tchvâ.

In bé djoué, sai déchijion feut prijé : è srait soudaît. Sai mère pûeré en aïppregnait lai novèlle pe èlle ïnvotçhé les celtes dûes pe Mârs, l' romain dûe d' lai dyierre. Son pére, lu, dié : mon bouêbe, t' és prou grant mitnaint po saivoi ç' que t' dais pe ç' que t' veus faire.

L' nové ladgionie feut enrôlé pe paitché d' aivô d' âtres soudaîts d' lai sen di nord. Mains mitnaint qu' èl était laivi, è s' musait bîn s'vent en son câre de tiere di Jura laivou qu' les sîns traivaiyînt lai tiere. Lai grie l' pregnait chutôt tiaind qu' è daivait mairtchie, mairtchie encoé en poétchaint ch' son dôs d' pâjainnes tchaidges en pus d' lai laince, di yève, pe d' sai l' airtçhe. Des années péssainnent, è n' les saivait pus comptaie, djainqu' en ci djoué qu' ès tchoéyainnent dains ènne embuchtyaide, dains in p'tét vâ. Po l' premie côp èl aivait vu ces féroches Barbères qu' ritînt en rotte dains totes les sens, è les aivait ôyi boussaie yôs breuyets. Les braives ladgionies eunent bél è épreuvaie d' se baittre, ès feunent vaintçhu. Poi tchaince, note djûene jurassien s' poéyé tçhissie (è se d'mainde encoé adj'd'heu c'ment qu' çoli s' ât fait). È se r'trové tot d' pai lu dains in échpèce d' empoûesse, â moitan d' in p'tét bôs. L' temps d' ènne aivâche, è r'pregné ses l' échprit. Sains trop saivoi laivou allaie, è paitché d' lai sen di meûçaint pe mairtché tot lai neût. Â maitin, èl était en lai riçhatte d' ènne prou grôsse r'viere. Di temps d' doûes s'nainnes â moins, èl lai cheuyé d' lai sen d' l' aivâ. Tiaind qu' è trouvait des haibîtès yûes, è fsait des détoués foûeche qu' èl aivait pavou d' voûere quéqu'un. In djoué, èl aivait épreuvé d' s' aïppretchie d' in hanne qu' graiboïnnait tot d' pai lu in p'tét câre de tiere. Mains l' véye hanne s' était sâvè. Poi tchaince, sai féye qu' vadgeait des bèrbis pe trop laivi d' li était v'ni vés lu. Dains in mâçhat d' landyes, celte, laitîn, patois, ès s' botainnent è djâsaie ensoinne. Èl aïppregné qu' èl était en Sologne, raiconté qu' è v'niait di Jura, qu' è s' était enrôlé dains lai romaine ladgion, pe, hontou, è daivé djâsaie d' sai fute aïprés l' mâlhèy'rou l' aiccretchaidge d' aivô les Barbères. Lai djûene baîchatte l' aivait ravoétie drèt dains les eûyes, en aivait aivu pidie - mains ât-ç' que c' était d' lai pidie ?- pe èlle l' envèllé tchie lèe, dains yote bacu, po l' in pô r'botaie chus pie.

È n' en r'vegnait p' d' se r'trovaie sietè d'vaint ènne grôsse tâle, â moitan d' lai tieûjainne, d'aivô lai djûene baîchatte, ses parents, ses grant-parents, pe chés pus p'tés frères è soeûrs. An djâsont brâment en maindgeaint, pe lai grant-mère ne mainqué p' de dire en son hanne qu' s'était sâvè en l' aïppretche di Jurassien, qu' c' était in sâvaïdge. Aïprés lai nonne, lai baîchatte aïpparoyé ènne coutche ch' l' étrain dains in câre d' lai tieûjainne, laivou qu le ladgionie s' coutché, s' endremé pe rontché.

Tiaind qu' è s' révoiyé l' djoué qu' cheuyé, note djûene Jurassien r'trové lai Mairie (ç' ât dînche qu' s' aïpp'lait lai djûene baîchatte) qu' échâlait des faiviôles. È yi d'maindé in couté pe l' édé dains ci traivaiye. Lai baîchatte poétchait âtoué di cô ènne fasse qu' dous croûejies bôs pendînt â bout. Qu' ât-ç' qu' vôs poétchèz li qu' èl oûejé yi d'maindaie ?

È bîn voili. L' annèe pèssèe, sînt Maïtchîn ât v'ni dains note v'laidge. È nôs é djâsè di Chricht qu' ât v'ni chus ç'te tiere, è nôs é dit qu' nôs l' daivîns prayie, pe chutot qu' nôs daivîns meu vétçhie ensoinne, c'ment des frères. Pe, èl é baptaiyie ces qu' l' aint v'lu. È m' é baptaiyie, pe m' é bèyie l' nom d' Mairie. Ç' ât l' nom d' lai mère di Chricht. Dâs ci djoué-li, i poétche ç'te p'téte crou qu' ât l' sîngne di Chricht. Pe vôs, qu' dié lai baïchatte, c'ment qu' vôs s' aipp'lèz ? Oh, vôs saïtes, moi, i n' ai p' de nom ! Tchie nôs, en l' hôta, an m' dit note Grôs, pochqu' i seus l' pus véye des afaints d' mes pairents.

È v'niait d' dire çoli tiaïnd qu' lai mère d' lai Mairie airrivé en lai tieûjainne po aïpparayie l' dénèe. L' Grôs pregné l' graïboïnnat pe rité dains l' tchaimp po édie l' grant-père. Dains sai tête è s' diait qu' è n' poéyait p' eurpaitchi tot comptant sains faire âtçhe po ces dgens qu' l' aivînt che bîn r'ci, pe ..., l' imaïdge d' lai Mairie regu'nait dains son tiûere !

Les djoués pèssainnent, l' Grôs n' était p' preussie de r'veni dains l' Jura. Èl était aidé l' premie po eûffie ses brais po traivaiyie lai tiere, po ch'gondaie c'te famille qu' l' aittieuyait che bîn. Â mois d' ot, ç' ât lu qu' aivait sayie tot l' biè tot d' pai lu, di temps qu' poi d'rie, lai Mairie aivait djaiv'lè pe dgierbè. Pe tchètche djoué, ïn pô d'vaint l' coutchie di s'raye ès fsînt les mayattes.È ravoétait lai baïchatte dôs son bé p'tét tchaipé d' étrain que t'niait lai drassie dgierbe di moïtan en sôriaint. Mitnaint, ès s' dyïnt te, nian pus vôs. L' drie soi des moûechons, èls étïnt â bout di tchaimp, tiaïnd qu' le Grôs dié : Vîns Mairie ! Nôs ains tot moûech'nè, nôs s' dairîns ïn pô sietaiè dôs ci tchène, en lai riçhatte d' lai Loire. È ronté l' bout d' ènne braïntche di tchène qu' était tchoi, pe s' sietè tot contre lai baïchatte. Èl ècmencé d' taiyie l' bôs d'aivô son coutè. Mains, t' taiyes ènne crou qu' dié tot d' ïn còp lai Mairie ! È ô qu' dié l' Grôs en piïquaint sai crou chus ç'té qu' était ch' lai goûerdge d' lai baïchatte. Pe, y' bèyaint ïn dou baïjat ch' l' araye, è y' mairmeujié : Mai p'téte Mairie, i t' t' ainme, pe c'ment qu' te m' és dit qu' te poéyôs baptaiyie, i te d'mainde d' me baptaiyie. En s' t'niaïnt poi lai main, èls entraînent dains lai Loire, pe lai Mairie voiché d' l' âve ch' lai tête di Grôs en diaïnt « I t' baptaiyie Maïtchîn, â nom di père, di fé di Sînt-Échprit ». Ès s' embraïssïnt encoé tiaïnd qu' des bieûs l' oûjés s' envoulainnent des époulats, pe qu' ïn couppe de dyirèts pèssé drèt â d'tchus d' yôs têtes, en fsaint è fyottaie l' roudge cheûtes-me-djûene-hanne di tchaipé d' lai Mairie qu' envïrvôté les crous des dous djûenes l' aimoéreus !

L' herbâ airrivé. Tot le v'laidge tchainté tiaïnd qu'le Maïtchîn pe lai Mairie dainssainnent en lai grôsse fête qu' les Celtes fsînt aidé en l' airriere-séjon. À bontemps qu' cheuyé, l' djûene couppe r'venié dains l' Jura. Èl emmoïnné d' aivô lu ç'te còtume des Celtes qu' an aïppele d' nôs djoués, dains l' Jura, lai Sînt-Maïtchîn.

Vôs Jurassiens qu' ainmèz vote câre de tiere, n' rébiètes chutot pe de r'tçhri les pieres que d'moérant d' l' oréj'noûere qu' aint mâj'nè note Maïtchîn pe sai fanne lai Mairie en l' hanneur d' ci sînt qu' les Celtes ainmïnt poi d'tchus tot pochqu' èl aivait copè sai vétture po lai bèyie en ïn poûere diaïle qu' édgealait ! Bîn des siecles pus taïd, d' âtres sînts qu' sont v'ni dains l' Jura sont aïvu tot ébâbis d' y trouaie l' oréj'noûere de sînt Maïtchîn laïvouè qu' an aivait dj' prâtie lai boïne paiole, ç'té de Dùe.

J-M. Moine